

Concorso „Dimela cantando“, 8° edision

per cansoni nove che le sarà sonade e cantade a la 9° edision de 'l Festival dell'Istroveneto

Cosa se ga de far?

Ghe vol mandar **entro el 15 febrajo 2020** (no existi proroghe) la canson per posta 'letrònica a'l indiriso:

cultura@unione-italiana.hr con el titolo **Dimela Cantando 2020**.

Cuando che mandè la canson, gavè de scriver:

- titolo de la canson e chi che la ga scrita
- chi che ga fato la mùzica
- chi che la cantarà
- el testo in formato word
- la registrasion fata in studio bela e pronta, cusì come la ga de eser

Stè 'tenti:

Le canson che mandè

- le ga de èser scrite in istroveneto
- no le pol èser stade mai publicade, cantade o sonade prima
- no le pol durar più de 3 minuti e mezo (secondo più, secondo meno)

Un autor el pol mandar a'l màsimo do cansoni.

E cosa femo dopo?

Tute le cansoni che le rivarà per tempo e che le sarà fate come che scrivi cua sora, le sarà valutate in modo anònimo de una comision fata aposta che ghe ne sielzarà 14 in baze a'l valor artistico e co' particolare atension a'l testo.

Cosa che disi la comision, cusì ze e no se se devè rabiari.

Sielte le canson, tuti i autori i sarà informadi de come che ze andade le robe entro el 2 de marzo 2020.

L'organizator el se ciol el diritto de domandarghe a chi che ga scrito el testo de cambiar la parte che no la ze in bon istroveneto e, de conseguensa, de corèzar 'sta roba anca in te la parte cantada. Stesa roba la val anca per la mùzica e l'arangiamento. In parole pòvere: voi fe' el vostro mejo, ma se' d'acordo che qualcosa se pol anca cambiar, se servi, per far più bela la canson.

Cosa ze de novo ancora?

Niente! Anca 'sta volta niente bazi (muzicali, se capisi) per cantar: le canson le sarà sonade da'l vivo de un'orchestra. Cuesto vol dir che, dopo la selesion, ve contatarà el produtor/capobanda de l'orchestra per capir insieme come sonar 'sta canson a'l mejo.

Come la va 'vanti la storia?

Ben. Quando che se se ga meso tuti d'acordo sun tuto (testo, mùzica, arangiamento) e se servirà cambiar cosa, gavaré un poco de tempo per méter a posto le robe e mandar la canson come che la ga de zguardar per bon.

A i autori de le cansòn che le sarà sielte, ghe refondaremo le speze de incizion de la canson.

Cuando se vedemo dopo?

Cuando che l'orchestra la sarà pronta, se se incontra tuti insieme per far una prova generale. E dopo, come senpre, faremo tre serate. Forsi anca quatro o più. Insoma, vedaremo. Tute le date, come l'ordine de ezibision, ve le faremo saver per tempo.

Cosa se vinsi?

Le canson le sarà sonade e cantade da'l vivo. Le meje, le vinsarà el premio.

Che premio?

Premio de la Giuria (per la meja canson): 1.000,00 euro;

Premio per el mejo testo: 500,00 euro;

Premio per el mejo arangiamento: 500,00 euro

La giuria la podarà dar anca una Mension per cualcosa de particolare che merita (ezeclusion, interpretasion...) de 300 euro.

Premio de'l pùblico: 1.000,00 euro

Premio de i artisti: sorpresa!

Se scrivi in euro, ma pol èser anca controvalor in kune.

El premio el ghe va a'l autor de'l testo de la canson, dopo sarà lu che el spartisi a chi che 'l vol.

E per finir

I autori i ghe cedi i diritti de autor a'l organizator per 'sta ocazion, ma isteso ghe resta i diritti previsti da la lege.

E sì: chi che partèsipa a 'sto concorso el ze d'acordo co' tuto cuel che scrivi quà de sora, anca de èser filmado!

Ve recordemo che l'istoveneto no 'l ze solo 'rimòniche e bei veci tenpi, ansi, pol èser tuto cuel che se vol e, soratuto, sarà apresade cuele cansoni co' temàtiche e forme muzicali contenporanee...de ancùo insoma.